

四庫全書

集部

欽定四庫全書

集部

東堂集卷二

詳校官庶吉士臣陳若霖

侍讀臣孫球覆勘

臚錄監生臣李光緒

欽定四庫全書

集部三

提要

東堂集十卷

別集類二 宋

臣等謹案東堂集十卷宋毛滂撰滂字澤民

衢州江山人官至祠部員外郎知秀州陳振

孫書錄解題載滂東堂集六卷詩四卷書簡

一卷樂府二卷滂嘗知武康縣縣有東堂故

以名其集也初元祐中蘇軾守杭州滂為法

曹秩滿代去已行抵富陽軾聞有歌其惜分
飛詞者折簡追還留連數月由此知名然其
後乃出蔡氏兄弟之門蔡條鐵圍山叢談載
蔡京柄政滂上一詞甚偉麗因驟得進用王
明清揮塵後錄又載滂為曾布所賞擢至館
閣布南遷坐黨與得罪流落久之蔡卞鎮潤
州與滂俱臨川王氏婚滂傾心事之一日家
集觀池中鴛鴦卞賦詩云莫學飢鷹飽便飛

滂和呈云貪戀恩波未肯飛卞妻笑曰豈非
適從曾相公池中飛過來者乎滂大慙云云
是其素行猥薄反覆不常至為婦人女子所
譏人品殊不足重即集中所載酬答之文亦
多涉請謁干祈不免脂韋澳忍之態故陳振
孫謂其詩文視樂府頗不逮蓋亦因其人而
少之然平情而論其詩有風發泉湧之致頗
為豪放不羈文亦大氣盤礴汪洋恣肆得二

蘇之一鱗片甲在北宋之末要足自成一家固未可竟置之不議也謹從永樂大典蒐採裒輯釐為詩四卷文六卷仍還其十篇之舊其書簡即附入文集不復別編至所作東堂詞則毛晉已列入六十家詞中世多有其本今亦別著于錄焉乾隆四十六年九月恭校上

總纂官臣紀昀臣陸錫熊臣孫士毅

總
校
官臣
陸
費
墀

金府巴厘金言

提安

欽定四庫全書

東堂集卷一

宋 毛滂 撰

賦

恢復河湟賦

并序

崇寧壬午皇帝即位之三年舉用俊良歸河湟之地盡
復神宗哲宗之政明年取西平復以為州縣升平故事
無有遺恨於今古者羣臣上萬年之觴薦勲宗廟天下
驩忻共戴皇帝斬千萬年如一日草茅臣滂謹稽首北

闕下獻聖主恢復河湟賦云

洪惟元符庚辰皇帝升聞潛宮奄有四海時御六龍扶
桑出日杲杲在東下臨萬國蓋靡有不照退托三年而
言出乃雍爰登弼輔庶代天工何棟撓而鼎折方雲陰
而氣蒙俄八風之顯宣條五色之當中於是散清議之
約結破羣邪之牢籠一之日剔蠹去惡二之日遂良顯
忠鏡照妍媸龜灼祥凶了然見治道之所以然者其堯
舜禹湯文武之業固已素定於淵衷地平天成仁洽德

隆無一夫之失所意比屋之可封於是屬王猷於清淨
付名器於至公遂成一王之典則遂尊九仞於熙豐皇
帝乃眷西顧曰嗚呼噫嘻在昔奉陵長撫遠駕抗稜四
裔布德中夏有事鬼方飲馬三河坐變椎髻其冠岌我
念恢拓之崇閔卒圯壞於公曆嗟乎方當耕蔥嶺之雲
何忽阻玉門之獵肆驚鳥之還巢顧伏疹之在脅吾將
何以西厭月窟東震日域而嗣守丕業也遺臣老将折
衝萬里之士流落江湖身放名圯撫劔躑躅中夜而起

皇帝曰吁方啓丹冊開雲臺用以待爾往復而功無煩
折筮將臣拜手曰惟陛下聖德丕冒海隅出日罔不率
俾雖橐弓卧鼓當使四夷而為隸豈染鍔刃獨謂三
河之可髓維太歲之癸未六師臨於湟水猶順風而疾
呼無遺鏃而亡矢椎牛醜酒波屬雲委以迎王師如見
兄弟工不下機農不輟耒露頂肘行東向而朝天子者
矣於是緹衣韎鞞携持萬里望觚稜之鬱蔥識勾陳於
太紫孰謂荷氈而被毳亦得昭景而飲醴簾金龜綬雨

露泥泥遂開亭障於覆孟坐得山川於聚米唯是西平
老羌據險負固尚假氣於游蒐聊岨強於朝暮故介冑
之士貌貅之衆相與虓闕而勃怒紛流涎而睥睨將膾
其肝以益朝餽之哺歲在甲申乃盡發五路之戍左攬
繁弱之弦右接肅慎之羽帶干將而秉玉戚颺奮霆擊
其往如霧皇帝慈仁寬大唯生是好唯殺是惡徘徊受
降之旌丁寧出生之路聲與風翔而德從雲游大啟歸
途之寬裕王師陟蹙履險排捷陷局凡十有三日肅然

烟滅於蟻聚茲可謂之神速殆若從乎天雨巢清穴冷
去若脫兔矣念彼遺死窮深僵骨寒冱如將飲其頭如
已扼其嗉如刃在領何敢反顧臣竊聞沃野千里厥田
上上是為禹貢雍州之域在漢為州十九而蟬聯內屬
者三十六國逮幽州之亂唐而西平河湟之地盡為贊
普所盜而得此皇帝所以赫然憫然未嘗忘於頃刻顧
為此羌憑凌險阻鎧冑精良種類健武來不齋糧集若
風雨雖謀夫策士老兵宿將為世飛虎者聞師出之日

猶逡巡睥睨計利鈍且十五年也惟皇帝沈幾先物神
武雷斷知天與而必取故選將授兵而曾不泮矣也矧
大臣魁壘蔚為棟幹制勝於兩楹成謀於几案實仰稟
於聖畫乃克濟以廟筭躡其壯哉夏折右臂唇亡齒寒
猶寄命於頃刻漸羽毛之凋殘雖然烏止於一方其荒
服君長殊隣絕黨罔不矯足抗手以尊天可汗者矣惟
我宋受命更八聖人今一百四十五年德在生民風流
管絃其博厚高明悠久無疆坤轉而乾旋變化開闔妙

萬物而無方者逮皇帝得其大全煥乎其有文章巍巍乎其有成功宜肆覲東后告格皇天自古在昔婦人賤隸之言或載之雅頌信於後世以考其君臣之賢矧賤臣滂本江東之諸生漁獵文囿老於筆耕顧得解衣盤礴摹寫升平感茂陵之遺忠尚覲援筆而賦冀目覩陛下之告成

擬秋興賦

并序

僕少多難初無宦情不知委曲以向物七年荷鍾灌園

追蹤大人自惟遭世清平朝廷有道君子在治貧賤恥
矣妻孥糠豆日覺不贍前得郡掾曹故自勉以行時去
先廬而將南泊郊寺而逢秋舍館高明山水秀合夕颺
入簾曉涼侵榻爬搔隱几星髮垂脰昔潘安仁三十有
二始見二毛寓直散騎省而有江湖山藪之思僕少潘
安仁八歲時異事殊而其志不同顧頭獨蚤白耳今茲
遠畏日之煩歎接蕭辰之清厲追數節物之變摹寫田
家之樂驅除肺肝之鬱滯作擬秋興賦以自見

義和策轡於丹衢兮雲岬崑而迢邈御絺綌以交筵兮
膚漫瀾而汗渥企西風之來斯中悶然以求濯允天吏
之周旋夏獨使人而心痺冬凌競而沍結景慘慄而窮
短悵修夜之悠永眷布帛之餘煖至春則氣回於和物
蠢而舉風疊疊而披離雲娟娟而容與弱草紛以無名
希蘭芷而並蕝軒微禽之啁啾滋乘居而匹處被生生
之大德咸桀驚而自怙凜乎清哉昊天之際穹蒼無痕
而廓寥森松栢之勁氣傷凡木而先彫邈鷹鷂之蕭爽

橫空闊而飄颻伊鳥雀之奔迫折頭顱於霜散鴈噫噫
而懷歸燕索索而辭巢掃鬱滌滯兮惟秋之有力古之
人亦何為愴恨以悲而無聊田家之樂兮秋日歸吾田
而經吾籬垣稻已實而穞稭菽含英而敷腴鷄肥酒熟
薄稅既輸芋粟堆盤葵薤充厨紛舉酌以交勸翩既醉
而相扶僕時有江南之役足將行而屢却絕城市之迫
塞得紺園之虛泊溪山迎前竹栢森若畫則諸峯無雲
軒昂磊落雨斷晚虹山氣綽約翠色潤活飛上簾箔方

潦收而水清露下而蘋老鷗落園沙烟抱踈蓼僕方登
臺而四望知天遠而無所至極庶幾躍九萬而升暘谷
兮挾日車以効余力蹇淹留乎昆吾耿中正以照此下
國意悠悠兮隨雲烟而泮矣目瞭瞭兮見飛翮之出沒
既而睨靈琬晚崦岵陸離蟬既咽而洊急葉已脫而復
吹燈炯炯而出簾螢的的而投帷夜參半而不寐澹偃
蹇而有懷彼娥娥之佳人居華陰之雲崖敬持南金以
交驩又參差而願乖睇蒼茫而莫致祇奄奄而霧霾吁

嗟兮僕將行乎四方汀滸不可以浮舟而世無驕驕又
將家以休兮翳蒼不可以為柱豆萁不可以為梁逝將
去茲而棲遲兮步滋蘭之畹而襲此蕙纓飾以崑崙之
璧兮又中以東海之夜光擷朝菌而不饑兮仰沆瀣而
內涼攬浮雲之輪囷坐鵬翮而相羊驚白髮之侵凌省
余年其未央詎星星之見髭或種種而未長獨引吭以
思晨中耿介而激昂將策足以升高則階何為而可致
將引手以汲深則綆何為而可索又將必得僂芝為僂

舍常何為容耶誠人力之可為將天理之不亮參苓桂
芝則病者必畜賢良俊乂而治世所訪彼豐城之夜氣
干斗牛而直上顧延平之未歸蓋已驚人之觀望為珪
璋者必知其非石亦徘徊而待價鼓刀者意在鼎羹操
築者卒成此大厦豈知神奇之不為臭腐茲又豈可以
久假譬風雨寒暑之序焉蓋紛相轉以榮謝何必求服
而驟進貪餒而妄食將潛淵泉而濯鱗將憑風雲而開
翼忽來去之難把盡秋毫於帝德噫嘻僕其南征哉無

東方之滑稽兮將不可以自薦彼封侯廟食兮孰敢誰
何彼投筆而起者不幾於狷也拂外物之儻來詎趙孟
之能賤亂曰風露既降淒以清兮壯懷擗標撫以驚兮
氣橫馘矇浮雲平兮赤心易感白髮生兮蕭然夜榻一
影并兮天潢洗月相對平兮孤吟聆響無人聲兮踈颺
過竹翻簾旌兮

五言古詩

送徐天隱判官

齊王未知瑟吳犬終怪雪越游售章甫念子當折閱一
鳴豈無年百計但有舌西風吹曉波晨景散文纈嘈嘈
雙檣鳴萬里欲俄瞥江山真可人得酒慰愁絕咄咄無
足云與子男兒別

贈陳進士

民生委所窮出任增轍軻家山有蕨薇歸足瘳饑餓功
名我豈敢動若手足縛太官五斗粟飽食慙且頗老胥
抱文書俾我供吏課厭此將毋觀法在恐深坐舊書不

得讀掩帙充枕卧朋游久益落踳躓自老大近乃得吾
子聽語百憂破顏郎見清賞今子傾一座新詩已出人
珠玉落欵唾諸生正業儒風雅久不作子意有是哉吾
道便可賀

生日

案此題原
本有脫誤

夜光昭清泠璇源載圓折朝陽未羽儀五色先丹穴松
栢出澗壑衆木皆秃屑方其一寸青意已做冰雪東家
嬉戲時俎豆輒羅列未應須兒啼英標固驚絕公為三

朝老氣壓萬人傑經綸本帝賚遇合非力結舟成無長
川雲族有旱霓東風吹扶桑曉色開寥泬平生回天手
獨佇昆吾轍停鞭急節緩揮臂層陰決圖回掌中春摩
拂厚土熟一身等大地萬物小蜻蛚華嶽載不重河海
振不洩黔黎託回命草木恃以茁造物相始終流年難
老耄側聞宋鼎就未可羽力挈是乃為公象何但紀相
烈坐觀滿不溢玉鉉無變滅

寄曹子方便君

使君未知我得自吞臆翁我未識使君已聞伯夷風十
年詩卷裏未面先從容頃我客東都寄聲謝老農繡衣
南州來是爾使君公為爾掃菜色無襦當夜縫東都逆
旅人零落如霜蓬一屋願為氓歸勢烏脫籠既登君子
堂倒戈避詩鋒紫芝秀眉宇東野凜長松憐我骨磳兀
槽櫪駢兒童秣以玉山禾不置凡馬中去年溪城月使
君馬如龍呼我載後車詩月相腫臃揭來桑麻間午夢
回村春使君亦留犢往聽長安鐘相望渺雲海烟雪迷

西東遙傳摛彩筆秀句爭考功那知古槐畔苦語如秋
蛩一笑答雲山萬事付瘖聾吞舟亦失水虺蜉登背宵
拂鐘雖不錚綴履豈所工天高白虎殿日永明光宮去
參鸛鷺羣勿羨高飛鴻

累蒙周開祖使君貶示佳章才拙思荒媿不能
報謹勉次韻一篇少叙敬避老匠之意

居士稱陸蓮香山本流亞舌端元和風吹倒兩鮑謝游
戲筆硯間盤礴湖山下過眼盡詩材有欲天必借句源

發肝膈輸瀉每不暇歎唾生江河奔放那可壩我詩沮
如爾欲過不足跨數煩見波瀾意作蹄泠嚇平生望洋
眼癡膽不知怕亦識明月珠相投况非夜

對月憶滿子權

長風掠海來吹月散百鍊青天豁四碧雲靄不容綠窻
軒颯先秋露氣入簟扇空庭生夜涼蚊口不得擅入靜
暮客去坐偃適自便清牽睡思醒明發醉膽健披風睨
白月瞪視不為眩未甘景獨勝思出大句銜狂搜得無

竒猛吐復自吮篇成若奴婢氣骨終凡賤置棄不復收
嘆感退自旋起探君寄詩兀坐諷百遍駭哉劇雄勁百
札洞一箭間逢騁新竒春雲弄晴霏古意終重厚九鼎
掛一鉉吾嘗笑夫人語富則自願及嬰愛君念始自信
惓惓閱女當求媿慕士在獲彥鄙哉尋常者何用目識
徧得逢誠幸多既別遂堪嘖乘離時况久會合卜未先
思之不可見飛魂不身戀秋城崔嵬高圍我屹若圉安
得擘風翅飛出自殿巧為相見謀反覆竟未善惟當

遠相要共借月為面相離苟同天舉目亦兩見又况相
去間才止百里縣不知竟何如寄詩代請勸

見雪明日與祝山人游東湖僧寺訪陳巨中教

投留飲

風吹飛雨乾散作柳花毬危簷下舞鵲老樹騰蟠虬烟
空夜色垂膚寸凝酥柔曉屢踏晶瑩與君散清愁湖東
十頃玉月落漫不收照我肝肺皎出語和鳴瓊將我平
生客步入青松幽此客氣如霜逼人作颼颼嚼氷論世

事怒頰赤已浮盤中水晶鹽碧酒葡萄秋飲酒豈憂寒
飲水猶不憂手冷慎勿炙置之鷓鴣裘

過靜林寺與徑山老禪曳杖溪濱俯淺澗寒洑
可照隨流而前即淵然清深為作數句以告同

遊

寒溪數寸爾下有萬里天烟雲自變怪寸碧殊湛然蘋
風亦可入寧妨暫漪漣終觀鏡面平與君受媼妍有苔
綠蒙茸孺子俯可塞前窺漸難量忽此清泠淵魚鰕亦

無蹤但見空月圓陶翁步履處獨伴支郎肩倚策心自
知鷗鷺紛聯翩

次韻葉權之

二年錦衣城坐悵朋游落雙瞳不敢白但向湖山著頃
當舍之去眼界垂落寞忽逢昔所傾人事豈容約西行
追畫鷁北首望金雀斯人玉樹明映我蒹葭惡平生函
牛鼎顧可作雞臙干將久在治宜有當橐籥大器不忽
忽一飛要寥廓佳哉妙五言珠琲相磊砢長城矗金墉

金史四庫全書 卷一
銛鋒露霜鏑向我寧可當倒戈為之却我生已數竒世
味寒水薄茲行聊爾耳外物矧可畧所喜得公游昏愚
煩發藥不重千金裘為公了杯酌

暑雨蒸溽奉王元規學士

老火尚偃蹇稚金殊踈踏雨如甌笠汗但作氣蒸赫思
君屢欲往露頂不可憤坐懷屋漏下蝸牛頗爭席屋漏
人自佳泥沙卧圭璧我衰了無營飽睡夢書策家貧苦
無書豈復有漂麥不了湯餅事可致萬錢客正須裹飯

來濯足水三尺

育閣黎房見秋蘭有花作

南風吹露畦苦菜日夜花同榮有蔓草託質多長蛇
邇來合蕭條淒風寄薰葭禪房向幽寂雲日暖庭沙竹根
逢小春紫蘭茁其芽造物惜鮮榮寧肯及幽葩偶出白
帝恩未必黃鍾家芳馨半孤冷蕭艾終橫斜譬如隱君
子悃悃初無華深藏不自獻清芬亦難遮陶翁抱踈韻
對此心忻嘉離騷久相從濁酒不待賒紉衣濯滄浪援

琴卧烟霞

解武康縣印至垂虹亭作

娟娟東堂月瑟瑟北牕風
半夜渡龍尾隨我藕花中
徑邀此花香追路溪城東
溪山久俯仰臨別亦怱怱
三年虎落檻一日鵠開籠
何須見似人聊作逃虛空
今宵花亦遠餘香歸故叢
殷勤此風月隨我登長虹

歲寒而春遲閏正月猶有雪三日乃消今日方

晴快

東風果來否雪意不肯消初疑寒作威勢猛意反韶玲
瓏開瓊花瑤草亦有苗細觀如可人玉立耿高標華屋
本無寒錦帳裘狐貂所憐小桃杏凍蕾抱寒條却看雨
成花祇憂身當樵語花慎勿憂春久屬雲翹徐行意不
淺晚發必後凋年年綠暗時逮此紅芳天左提白玉壺
右把黃金蕉往逐春未央不但永今朝曉來紅日暎花
信到柳橋

秋日書懷

秋日吐微明寒葉墮半碧娟娟竹弄影冉冉香引脉牕
明棊几淨水石涵虛白茶開睡足眼苔上懶行屐屋寒
無燕雀豈獨少賓客顧我警露鶴佇此遼天翮相對雖
不言孤高比三益邇來世外心漸覺眼界窄兒時喜功
名今念真戲劇平生翻羹手欲爛誰能炙豈待二頃田
初無一屋宅第當營糟丘努力期百尺頽然寄踈慵坐
看駒過隙韓郎食不足苦心定誰惜那知落英繁吾食
豈無夕舉手謝飛鳶一鼠何勞嚇

次韻張臺卿桃花詩

使君園中花造物勤管領佳人含朝酒風軟吹莫省正
應武陵裔或駕瑤池影誰云六果下

出家語

實抱千歲永

得地倍穠華無人亦妍整舞困霞衣翩粧早燕脂冷玉
堂搗藻筆一顧長光景誰識勸農心殷勤待遺秉

原注
崔寔

月令三月桃花盛
時農人候時而種

汪發彊中見遺佳篇筆勢高妙且從僕求詩以

歸輒為此數句

落落湖邊松濶濶松下風冷然入君懷蕭颯詩脾中清
露瀉筆端一掃浮埃空以遺愚參軍僅免按劍凶三年
耳目昏此語豈易逢亦豈務炳烺邂逅乃自工歸囊一
錢盡足用仍三冬他年太羹熟寧俟鹽酪供

送僧覺歸上饒

原注覺有妻子一
日棄去為沙門

上士垂暮年不受煩惱攻欲修沙門果坐怪鬚髮空言
有摩尼珠自照迷妄蹤當來滯礙心如以巨物撻妻子
昔所愛今斷如潰癰欲作大醫王徧救瘡與聾長安坐

寂寞饑腹聽午鐘行歸洗黃塵誓將掃青松一盞渡長
淮東望迦葉峯我走名利場未可談從容軟語感屢發
為我清心胃上士無住著此別何由逢

贈別講僧若水

道人永嘉老口作智者語坐禪鐵如意寶藏發深貯行
住自如如當亦無住所踏雪來東山了不憚修阻孤雲
亦何心東風復吹去索詩讚行色我敢靳不與道人已
得道逢魔猶齟齬古氣生面目清流見幽嶼泠泠微妙

音松風雜寒雨九旬談妙用况乃超佛祖束歸花木繁
啾唧鳥雀聚道人具眼目要當反聾瞽萬事付一笑鉢
飯飽亭午聊以答道人餅巾過水澣

留別邵公言

公言雅知我良勝我自知往年得為僚稅駕清江湄覺
君有勝致真率仍天資定交傾蓋間快語明肝脾我生
七不堪百謫將安之官長笑不罵兒童容遨嬉掾舍等
禪房竹樹含幽姿其間有閒味共此非君誰駕言罵予

憂欲致車已脂往披五老雲下採蒼山芝儵然送日月
萬慮忽若遺竭來兩溪上邂逅寬所思微風送白蘋藻
荇搖寒漪水清不受釣魚細安可騎亦復可憐人鷗鷺
相委蛇君豈鷗鷺羣鷗鷺往追隨所遭即定分固有何
庸麾我生儻可用豈惜山英移榮華如食菘貧賤亦嘗
飴顧今適當還捃拾聊充饑從君借蓑笠破雨收江蘚

贈禧上人

此寺昔荒寒蠹黑相撐支世尊窘風雨鐘磬出茅茨吾

祖過而慨開索為營之一旦黃金宮突兀清江湄其徒
則以安其道猶遠而吾游童且白僅乃見此禧譬如蒿
艾中蔚然得江蘿昂藏老鶴骨勁瘦寒松枝宴坐了無
營孤香對逶迤海濤走牕檻江雲翔屋楣全收眼界勝
閱與人境辭吾方迫遠游未可分清怡

原註清怡
禧軒名

廣鑑大師觀上人為靈芝數百衆故乞從檀施
乞米求予詩送行為作一首予昔為武康縣令

觀師吾邑人也

靈芝有良田歲比萬戶侯平生不力耕以德作耒耨不
許倉箱豐但知鉢孟秋木魚一呼飯千屐如水流靈芝
道亦然飽汝即罷休但憂汝易飽未飽非所憂後生真
可畏見此觀比丘昔常為我民今迺從我游得道於靈
芝甯中羅珍羞豈特求自飽將副餒者求裹鉢忽何之
西風送輕舟處處靈芝田多稼如雲浮初以非種種今
當不收收誰施復誰乞大塊同一漚姑且置是事吾言
亦謬悠羨觀一身輕翛然遂飛鷗

盛暑謁劉公達

伏金避老火，遁日乾商霖。天地豈不寬，八荒一釜鷲。此
身返寒鄉，骨冷勢陸沉。忽疑同然灰，終得空汗襟。聞有
不熟符，莫致癸與壬。平生習雲水，兩足便幽尋。佩紳接
軫處，念往汗益浸。乃獨歎公關，熱行犯訶吟。忘公鼎軸
家，謂是緇帷林。有風靜陰躁，無愠煩鳴琴。置我弟子間，
豈不容魯參。公如天下雨，焦卷聽雷音。磬欬走旱魃，噫
欠停流金。胸中三絕編，寧獨自洗心。坐使人意消，煩促

變清深南山當朝隣暫卷乃至今萬物抱暵意油然後
層陰

昨夜陪諸公飲今尚委頓未能起坐聞孫守出
送陳祠部供帳溪上見招不果往戲作小詩寄
之

孫公金作骨何獨無燥濕雄姿逼龍虎風雨坐業炭黃
堂爛繡筵春甕融玉汁銀臺三見跋醉眼夢欲入公張
兩瞳電照我毛髮立平明郭西門鐘鼓仍盛集我方擁

黃紬勢作蚯蚓蝨乃知千里姿追趁何翅十春溪葡萄
碧飲渴誰當吸願君苦留客墮翠應可拾未用奏伊涼
舞紅催玉粒

琳老所居植竹發筍而草茁其傍作詩見寄為
賦一首

春風吹琅玕夏長蒼龍孫未見拂雲梢已引鞭驥根包
藏霜雪姿隱忍苔蘚痕其傍茁小草同出東帝恩恩深
草先高抱籜殊未掀歲寒兩何如一笑凝詩覓

猗猗亭夜月

猗猗亭下竹娥娥竹上月微風靜蘭路水石相映發盈
前嬋娟子秀色祭玉骨褰衣往從之露泣苔侵鞮

溪上

溪光照秋房娟然卧流萍水仙弄幽姿寄余汀洲情卷
懷玉色子弄波濯塵纓夜寒有佳意屬此冷然清

案此詩未

樂大典原本闕佚今從宋詩紀事采補

欽定四庫全書

卷一

欽定四庫全書

東堂集卷二

宋 毛滂 撰

七言古詩

十二月十二日雪晴成允蔡君扁舟携詩見臨

次韻奉答

蔡子下筆生濤瀾少時往往思湧泉便當自作五鳳樓
畫楹刻桷皆蠻牋昨日千秋橋畔雪楊花蝴蝶相睽翩
徑喚紅粧弄春色千壺快倒萬錦纏那知蔡子足踐地

柳車送客已復延搖竿孤唱頗自得閉門高卧初誰賢
幸來餉子小樓日共看簷影移殘年東堂夜寒劔有氣
北窻晝靜琴無弦高門懸薄固踈矣所憂餓虎猶須鞭
齒搖目眇懶自薦豈復珠貝如懸編仙人玉樹儻相待
只擬醉拍洪崖肩堯舜之事不足驚肯為兒女癡自憐
故山鶴帳久不往白雲封戶端應全吏卒無令守叔夜
弟子何妨嘲孝先伯倫天地席幕爾何處六翮猶爭前
平生小吏輕子美未害故人踈浩然子今風霰動短褐

豈乏錦繡裁長篇東堂那記城旦語唯有詩律曾家傳
墨香紙滑霜兔勁明牕妙意常空圓客來指似寧信此
自知食蜜甜中邊

李白於宣州謝朓樓餞別校書叔雲一首十二
月初六日夜獨坐松齋懷抱良不佳飲少輒醉
庭下梅兩株月色皎然倚樹微吟偶誦李白此
詩有會予意者次其韻追和一首

棄我去者昨日之日不可留醉我心者今日之日多煩

憂秋風吹鴈渡汾水斜陽隨客下西樓苑邊麒麟守白
骨半夜安能保明發小蠻為酌流霞春醉倚梅花滿懷
月暗香吹遠月欲流松聲百尺喚清愁早掛銅章老槐
下短蓑獨速上漁舟

孫使君見招以不茹葷得醉因過南禪老飯小
休庵中作此詩寄之

城南病客食不足日與天隨爭把菊饑腸昨作細泉響
豈識韭齏并豆粥五州自有定遠侯虎頭燕頤飛食肉

門前麴封何足道酒出兵厨瀉春瀑康成溫偉秀兩眉
何啻五斛當一斛席中珍句出半酣但驚墨逕通羣玉
不知清風靜掃脾徒見秋電寒搖目相君脫粟好名爾
何用留侯歸辟穀我今枯槁固其分尚有閒氣蟠空腹
侯當下士屈體貌屢喚不來仍不逐羊膺魚尾癡不食
却覓山僧煮寒菽敢煩龐生要粟里欲謝揚公向疏屬
午庵聊拂偃月牀卧聽春飈過修竹

秋雨杜門久之比晴一出前村歸聞陸令見過

奉寄一首

子桑閉門十日雨何人裹飯相勞苦
忽窺晴色入踈簾
徑向孤村尋老圃不知雙鳧念雲水
欲下雀羅風送起
未容倒屣見王孫豈是揚鉞嫚
公子長安秋雨乃復來
山陰夜雪仍空回他時乘興幸告我
請掃門前紅葉堆

新酒熟奉懷曹使君

水沙卧甕青練幕浮蛆欲上真珠泣
濛濛崑山清露零
洗下雲腴和玉汁小槽泱泱秋泉語
老盆艷艷春光濕

不妨力飲薦寒英只憂秋老金膚澀先生何翅七不堪

袍鞞裹縛肩骭急醉鄉禮法稍寬閒倒著接羅猶許入

南樓老子冰雪腸咳唾珠璣紛可拾未許王郎見短歌

原注曹公自識

面裁見三絕句

已容趙壹唯長揖

原注頃來歸未及謁而公折簡先至云第

著帽進勿拘俗禮

邇來鈴齋作禪觀錦瑟間多山玉立

原注公昨日得

簡云郎齋極岑寂寡味

欲留一斗向吳興何日南樓和月吸

立秋日破曉入山携枕簟睡於禪靜庵中作詩

一首

西風初起無人鄉雲深萬籟含清商山容便與新秋淨
稻花已作豐年香斷蟬抱柳咽殘月卧霞排霧通朝陽
過橋寺影出疎木入戶竹色來低牆蒲團紙帳兩寂寞
獨有老檜磨風霜東堂老子喜睡人來借一榻樂未央
含風漉漪開玉脊小屏晚綠橫瀟湘夢寒支枕風入髮
過眼冉冉茶烟蒼紅薇花陰煑玉醴滿甌飛雪置我旁
平生世味總如水老大縱健肝膈涼儵然此意不可道
卧看石竹凝孤芳

出都寄二蘇

滂去年冬去田里而西歷春度夏出闕已秋
逆旅酸苦節物感人此詩書一時所遇之事
以自見寄獻內翰舍人蘇公伏惟一覽幸甚

近年好語開感額廊廟主人還稷契諸公彙進民所懷
左必提之右乃挈善隨類舉皆可觀野無遺賢靜巖穴
石梁有客少讀書神接前人望風烈志與時違可奈何
居賤好高謀已拙此身悠悠日江海弔影行吟事酸噎

揣摩胸臆作西游不成興起慚豪傑賈生慟哭初亦疑
十年自覺流清血三書不用即山林將前復却何從決
無因名姓累吳公咫尺天光阻羅列志士惜日誠可憐
每恨平津當老節子雲年少行所為今出秦關獨疲茶
郭門嚙臂良感人仲卿蓄縮翻傷別叩關自鬻雖矜張
掃門願見猶推折炙手門前車馬多排肩屢進不得徹
近來索米却求田結綬彈冠非所缺更令胸臆從誰開
一刺懷歸定漫滅檻虎饑饒尾漫搖水盡海鯨當蟻垤

誰能忍恥寄我顏
妻笑嫂欺安用舌
北山記憶破臘來
遠水扁舟兩愁絕
雲重山寒暝不開
孤帆夜落嚴陵雪
雷山老桐凍弦斷
不作南風相煖熱
一劔星昏共形影
每恐龍寒呵古鐵
孟嘗無炭暖置身
杜雖有指不得結
可憐危肩聳及耳
浩歌能復彌清冽
吳山忽見梅花謝
天助陽春生筆下
近簷呵欠面發紅
故絮賣錢不須借
賣錢買船更欲西
墻頭立燕留新泥
新開湖南接淮水
楚山翠入天低迷
細風平日兩媚好
嫩黃梢轉隋楊堤

河名已清色未改減盡狂湍濁猶在東風正和水面穗
恃賴夷猶百無殆鬱鬱葱葱見帝臺祥烟瑞霧真佳哉
元都道士種桃手露泥風吹今總開山翠柔紅亦得色
鬪妍意不相低徊遊蜂上下逐蝴蝶蜜脾未飽爭喧颺
幽谷黃鸝出晴昊喬木幾遷枝葉老避寒何處過雪霜
依舊飛來語音好少年走馬紅塵道繡勒錦緣金絡腦
窈窕花隨寶盃飛暝旋風吹玉山倒可憐窮巷無芳菲
良辰不得開懷抱閉門曝背借餘暄猶得爬搔驅虱蚤

逡巡迷目風沙顛已報新花去如掃乘離執衡又一時
萬物從新矣帝造柳線漸長成畏日苦菜秀時蚯蚓出
烟綃霧縠自直錢故葛綻睽遮肘膝凌人頰冰下霄漢
誰信朱門自無汗蔗漿酪粉瑪瑙盤牙牀角簾光凌亂
石梁孤客賃屋居坐恐炊中忽麋爛蚊虻嗜膚俛聽爾
何苦羣鳴恣喧玩生嫌蒿艾昏淚皆寧強摑搭酸吟腕
墻陰壁隙又出蝎潛致小毒猶錐鑽巫師祝痛已復遭
術非驅除真亦漫聽鷄起坐難飽眠度寬煩促須清旦

進不知名仍退却既來亦好歸不惡義和鞭御向西行
出門感此梧桐落淡月孤烟侵曉昏小雨淒風動冥冥
且欣編簡堪卷舒那知羞慙憂垂索鐘鼓聲沉北斗高
白日漸遠傾葵藿楚歌忽斷隔黃蘆已見金山高磊落
須臾崩車天上行長幡亂舞喧簷鐸蒼穹白浪兩低昂
黑蛟黃虬森噴薄開帆掉櫓六鼉驚男兒信命方自若
吳音朝晰來船近共憐遠客逃溝壑烏勸知還羽翮垂
修竹茂林欣有託故山茅屋良幽深清泉澗澗石鑿鑿

蕨薇雖老芋栗甜拾穗行歌亦云樂買竿釣魚誰更哀
貰酒滌器人應謔士通五經取青紫請謝夏侯烏有此
捷徑須知自有塗枉誦陳編腐牙齒潼關坐息感二鳥
耿耿此心聊復爾敢嗟與兄共槽櫪但苦酸醎異便美
擬希鋸利効細黠天與鈍頑難力砥五斗充饑未有時
却藏手板投耘耔曩聞下惠恬小官頗怪少游甘掾史
曼倩俄驚備大臣李渤諫官呼不起古人去就良不同
剛成亦足稱男子嗚呼乘時正阨窮悵望臨食空投匕

豐山蒲牢鏗有聲霜氣感發非擊槌昌黎誘勵方循循
廣文薰炙皆名士宋之善鳴挺有公願助下風脣口哆
當時一到匠石前至今人或疑杞梓大厦未完公勿忘
可惜空山終朽死燒桐願獻太古音處囊請試從今始
燭光有餘真可待無損公明公勿愛

呈蔡內翰

鄙夫十年江海客岸草汀鷗隨步屨稍收晚景付長竿
河伯供魚慰彈鋏烟雲不鎖北闕心飛出亂山青萬疊

東書却入國東門
觚稜瑞日明書笈
寒驢破曉踏春泥
誰家暖氣生牙頰
門前賓客鄙可憐
紛如寒蠶饑望葉
主人看屋客看地
士氣蕭條無一捨
適年恰得玉堂家
名在執鞭猶煒燧
玉堂丈人廊廟資
寶帶垂魚光逸脅
棣萼青春自一門
璇題白日常三接
側聞好士禮作羅
織鱗弱翮歸漁獵
蹉跎歲晚曳裾人
半彫鬢綠仍隨牒
澗溪幽菜儻可羞
試雜萬錢聊一笑

病中獨坐

千秋橋畔桑麻村槐陰覆砌綠映門關門誰覓病居士
掩書不讀惜不言明牕養石作幽伴蒼骨孤瘦棲秋痕
瀟湘洞庭入眼界念隨魚鳥蘆花根端知此想無是處
聊遣幻變驅昏煩請言居士往少壯烹羊烹酒拍盆
離騷百過亦徑醉萬事形影如空尊襄陽老孟識此意
數憑楚些招其魂祇今流落口吻燥病乃乘間排吾閤
病多諸念反衰冷念冷却覺丹田溫此田不應供喜怒
外物狼莠那可存誅狼去莠要及早俗慮可吐不可吞

鷄犬相聞太古末
居士中有五畝園
舒遲不稱子男服
要須結佩紱芳蓀

友龍姪來別留詩次韻

樵青煎茶青竹裏
汝欲過門鵲先喜
我家千里凌風駒
豈比虺隤鞭不起
我亦西游倦始歸
久闊相望老白眉
歸家且與阿戎語
長吟未覺長康癡
雨急烟寒波渺茫
念汝束書辭故鄉
歸時先驅煩蜀令
却過竹間尋漫郎

登聞鼓詩

九重赤塗高如天四海黔首紛於喙衆喙望天若無路
區區有意常能宣乃知聽卑四聰達萬里呻笑如郵傳
朝陽門外登聞鼓鼓下章飛如急雨一聲直墮勾陳中
誰言天門嚴九虎江南小吏無技能鼓間餬口何云補
僕饑馬瘦曉徐行官曹下馬初無營解衣小睡須臾散
鼓亦十日無一聲疑非官家設鼓意細問乃復知人情
文昌相公眼如月坐見萬里分毫髮蒼生痛癢吾一身
與汝一家無楚越有求徑投家丈人鼓面蛛塵寄蕭兀

亦何道業冠臯夔民得由之初不知平生胸中醫國法
盡變黃馘為秀眉力進唐虞作元氣醒釀病酒何勞治
端知聽訟破癥爾洞見五藏聊決之造化昇平唯一筆
弼成堯舜垂衣日墨客詩人慕響來朱草嘉禾時一出
登聞終日何所聞但聽清風頌聲溢江南小吏未歸山
乞與居山相似閒半饑終未免索米飽飯亦復勝抱關
鼓稀有聲吏竊食媿此無用毛髮斑

隋隄寫懷寄上右丞

前年買符入函谷歸來紫車仍露宿似聞石室陳圖書
敢累山公為題目蒼梧祇覺波浪高尺澤那知鱗尾禿
已將倦翮謝風雲便擬閒身寄松竹何庸復來良自嗤
聊當爾耳誰能卜生長寒鄉非挾炭老去剛腸徒仰屋
此日可惜那敢輕流年已徂無計逐淮山可人長好色
隨潮入落裁瞬息隋堤官柳令許長前年雪裏曾相識
尚有寒蛸抱殘葉晚風淒瑟真相逼斜陽更在拖樓明
孤烟已轉榆灣黑濁流奔猛似欺人前去高桅萬牛力

但令寸進殊不惡行或止之那可測朝廷無階亦何往
想見夔龍在君側取士端須拔十五除吏何妨論八百
為郎二世疑有命自著一生能幾履定知此意不在多
久從筆研安能擲太常掌故本下才未怪間闕難射策
仲翁陸陸元先售却令小苑東門後人生有志將毋同
異時善舞輸長袖此去誰家借蹇驢偈仄終看飯山瘦
平生讀書過百紙本是烟波釣徒爾筆牀茶竈輕鼎鐘
雨笠烟蓑傲朱紫如今却著從事衫猶喜無材堪鼓吏

自從東帶對小兒久妨痛飲追名士會須出處今勇決
進仍不合當休矣試來乞公五十牓投竿往覓任公子
豈特區區守鮒鮓更與侯生向溫水

比得狸一枚所過輒馥然有香時時翳蘭叢下
而引其鼻若能自擇其所處狸之族最多獨牛
尾食之可口江西亦呼為玉面然彼以甘肥遭
烹而此獨以能香為人所貴非衆狸可望也為
作此詩一首

春山得狸軀，膏細蒼頭抱。携香着袂，叢蘭密處，曲庇身。
狐鼠何疑相睥睨，定非青丘阿紫家。恐是中臺食栢喬。
太真妃子紫繡囊，一生長伴瑞龍香。石竹花開浴殿暖，
何時馨郁棲珠璫。祇今弭耳空山內，時下山腰出雲背。
弄香淺草已襲人，試雜江蘿為君佩。兒童手摩初不惡，
狐狸貌似安能輩。糟中玉面甘人頤，何食而肥蒸不悔。
東堂老子有香緣，百和烟間回盼睐。相從真亦得所哉，
便呼銅鴨為爾配。

和郭倅見寄

折節何須萬夫後，蟹螯居左杯居右。先生老醜誰使然，
天孫安能司唾嘔。尚無一字得三鱣，何如賣之不龜手。
與公正自一家人，公家日月余扁牖。每得新詩如見公，
風流好在靈和柳。題與那聽仲舉辭，宣室應懷賈生久。
當年竹馬定不乏，舊雨墊巾無恙否。我今信手任翻羹，
誰解苦心杯置肘。看公雋翮當在前，笑我勞驅空晚朽。
東山掩鼻直可人，庸肯噤喙論不偶。檻中搖尾未必然，

試看於菟薄欄吼

次韻奉酬蔡成允

蔡子詩鋒新發硎
壓吾境橫長城
玉闕食肉何足計
飯山日午吟膚清
叩門念子憂吻燥
銀瓶急燎蒼蠅聲

雲龍為子起風腋
要使飛將身趨輕

原注秦系與劉長卿善以詩相贈答

權德輿云長卿自以為五言長城秦系以偏師攻之今成允以詩雄於吳興者也僕今日方與客煎大龍團成允適至遂共啜之

對雪作詩未竟曹使君寄聲招飲因成篇以寄

東風欲辭閭闔殿未向百花枝上見先拂瑤臺玉葉叢
睽翮時落玲瓏片水晶宮中清曉寒蝴蝶窺簾輕暝旋
素光冷逼翠雲表元冰暗結青光研詩成玉屑帶冰書
興隨月繞清溪徧兔園老筆生陽春墨葩不待微和扇
明朝當見郢中吟雕樽快覆鵝黃面

劉秀才明仲當赴禮部試從縣令毛某乞詩聊
作一首

君不見廣文博士老鄭虔才名四十寒無氈又不見漢

陽計吏趙明叔文章不如一囊錢胷中道腴五味足外
雖枯槁中芳鮮不妨止有書一束索米未肯侏儒賢平
生固用筆耕爾行發墨頽收豐年會當少見會稽綬勿
嗟已賣瑯琊田

次韻曹子方對雪以詩見招觀燈

柳外東風旗影轉身遠鳴珂心想見碧瓦朱樓不夜城
走馬插花春一片錦靴玉帶簇金鞍回雪驚鴻都轉旋
我書細字對短檠油盡燈昏月窺研那知研節有七盤

但課舊書須百遍病骨煩招媿後車新詩乞與書團扇
明年相望隱侯鄉猶共碧霄端正面

對巖桂一首寄曹使君

玉階桂影秋綽約天風為捲浮雲幕嬋娟醉眠水晶殿
老蟾不守餘花落蒼巖忽生雲月裔仙芬淒冷真珠萼
娟娟石畔為誰妍香露著人清入膜夜深碎月寒相就
醪醪却作傷春瘦弄雪仙人淡紵衣烟裙不著鴛鴦繡
眼中寒香同誰惜冷吟徑名梅花魄小蠻為洗玻璃船

晚來秋甕葡萄碧

久客

平生故人同偪仄近者不見雲泥隔
男兒命好百不憂封侯起第如戲劇
我癡正亦坐命窮眼暗頭童守書策
風吹破屋雪入懷獨與蝸牛夜爭席
舊雨人來今不來唯有五窮充上客
人生羈旅誰過我欲歸豈惜還鄉幘
腹中鬱勃不耐事何用使人輕跛瘠
登山未厭日月流掩關但恐功名迫
讀書豈從升斗計勞生却為精神惜

不能與君爭上車主人未必如車澤但煩東風送帆脚
搖竿鼓柁三江碧

僕性懶慢喜睡而吏事亦早休因得遂其欲琳
老數語僕曰當屈伸步趨以散鬱滯乃以詩送
白朮或云餌朮能長生絕穀致神仙苟未至尚
能耐寒暑其骨健輕難老儻然則僕異時芒屨
布裘步尋此老於徑山之上爾

先生曉開城旦書坐與老農相囁嚅槐陰翠圓吏已散

歸來下簾手撚鬚胸中百紙無處使靜者窮達如呼盧
身閒睡飽亦不惡何用一躍驚駘駘去年鑿池築潛玉
清夜明月掛碧蘆先生獨吟亦徑醉誰見露鶴寒相呼
徑山老人笑踈懶云當運動如戶樞朝來此老意不已

溪寺破雨遺天蘇

原注木一
名天蘇

紫房鴈嘴擢烟縷細根蚯

蚓蟠苔膚茯苓雖老避芳液

原注陶隱居資木
煎啓曰芳踰玉液

團參已

貴慙雲珠

原注庚肩吾啟曰競
真雲珠爭奇米玉

先生領意手自植衣袂

馥馥侵蘿蕪

原注香草也古
人以藏衣中

從今抱甕十日往欲將後

健酬前勛何時一飽翳鳳凰
緱山月夜聽笙竽長吟往
覓五色麟翩然那復煩雙鳧
坐看白駒變古今浮漚流
電皆須臾此語險怪儻未
然引年聊與昌陽俱不須
仙人九節杖他年要與孫
爭途凌霄峯頭覓此老登
山過水安用扶

陪曹使君飲郭別乘舍夜歸奉寄

金波灑灑梨花玉

原注是
夜飲器

春色兩枝嬌映肉

原注當筵
見牡丹兩

枝
夜堂鴛燕落梁塵秋簾風露昏
銀燭勸客歸來半白

頭舊約參差兩黃菊新年斗酒亦徑醉道舊驪然能五
六御史家兒反溫克風前玉樹何由俗上客凜凜八尺
身秀在兩眉詩在腹醒狂司隸醉奈何猛雨瀾翻無軟
熟不嫌呼酒反勸君要看春空雲郁郁原注時主
數強人酒明朝
寧辭一日病清時未可三閭獨倒冠落佩郭南門長庚
睽睽山簇簇回頭一笑墮渺茫卧聽桐魚喚僧粥

曹使君置酒石橋山用肉字韻作詩見招不果
往復用前韻奉寄

玻璃瓶中新壓玉趨膾脞脞麟肉紫絲步障破烟霏
飴鼎灼炊千蠟燭山英餽公却薄相木蘭墜露和秋菊
此公骨秀氣欲仙石室名深三十六端知仁祖有勝致
豈比彥倫徙雋俗速收熊軾屏旌牙細步雲梯上巖腹
局畔雖無斧柯爛林間恐有蟠桃熟素書自愧無因緣
蕙路難陪踏芬郁南山食蕨得我專東山攜妓唯公獨
他年丘壑定參差小留莫遣歸心簇相對行厨洗玉盤
松花自煑顏家粥

謝人分寄密雲大小團

密雲不雨西郊黑小龍蜿蜒出朝夕

原注
池名

中有濯枝三

日霖可洗流金千里赤大龍雨足意貌閒萬里澤流纒
一息無心自為百穀仰變化風雲聊戲劇一杯洗心未
足言看瀆滄溟太空濕大月已圓當久照小月未滿哉
生魄雨龍出此雲月間背負青天擁霄碧豈惟大早有
雲霓解作豐年雪花白黃綾袋子天上來本是閩山早
春色金盤珠露猶浥封瓊房玉芝記相識朱門日上三

槐梢大官初頒萬錢食松風忽響第一泉乳花徐開練
波立我公胷中冰雪明不受一塵乘間入寧煩多飲氣
自清乞餘賤客猶能及此客羈賤亦喜茶老葉唯知煎
若漉藜羹粟飯每稱是九天雲腴詎應得舊聞作匙用
黃金擊拂要須金有力家貧點茶祇七筋可是鬪茶還
鬪墨東歸得此希世珍真同被褐而懷璧筆牀茶竈下
三江欲寄殘年向泉石砂餅煑湯青竹林會有玉川來

作客

東風辭

原注代人
作生日

凍雲不凝層冰活阿香推車上空闊龍蛇夢驚鱗甲暖
霰雪影斷清光奪玉帝手持綏生機馳召東風伴迴幹
東風駕言正月頭先驅持律吹九州勞苦萬物抱憔悴
噓呵太和如汗流草根暖回土膏動僵冷盡起寒威收
習習熙熙遠相屬原隰龍鱗吹小綠韶光漸深人不知
但見新新自相續珠璣零露日繽紛要助東風力作春
向使不來慰枯槁正應合抱皆樵薪眼明初破玄冥黑

咄嗟萬物回顏色何但桃李著榮華未遺免菘并燕麥
萬物之命懸東風誰云蘭臺敢爭雄披襟受之不容易
羣公不有歸我公我公人英國尚父代天與天通肺腑
夔龍土苴直唾棄有作自令物鼓舞為時生公豈非天
身任重大寧偶然氣壓千官山不動德行四海春無邊
東風功成看萬彙雨露涵濡寧惜費我公經綸亦如春
惠養元元作元氣萬口祝公如一辭願公顏朱髮常照
那知東風共無邊年年會與青春期

上曾樞密

燕齊日暮客不歸新豐主人豈相知不須買絲繡平原
不用黃金鑄子期會當酸鹹有同好主簿且須歸祭竈
請見臨川太尉公此語難為俗人道我公悅士甘如肉
萬錢供客飯脫粟讀書始堪屬大事誰論少文織薄曲
眼看齊相不六尺太史猶忻事鞭策胷中端正在眸子
巖電兩腫秋漢碧致君堯舜不足驚升平本付公輩人
西郊濃雲含雨色可勝枯槁懷陽春門前賓客馬如蟻

誰是我公天下士
赳赳欲進仍厚顏
紛紛無乃遼東豕
蹇驢破帽棲塵坭
曳裾最晚空餘恨
草奏猶堪試僞人
無令歸作潛夫論

元度生日

臨安有山棟圓紫
公家松楸當峻峙
子胥濤江相向流
秦望橫前為紫几
衆言北山絕雄勝
世當公相貴莫比
那知上帝賚良弼
嶽靈孕秀初萌此
有山如是固有人
茲雖人為亦天理
公生尚少抱經綸
前無夔龍何獨似

胸中五經通聖人筆端三代尊天子富貴相尋蚤厭餘
功名自會非所喜惟天五福不可求與公俱生亦久矣
生日壽公寧免俗強復囁嚅空可鄙矧我何物可厚公
世味都如一杯水古人白髮痛掃除強飯黃精力能爾
公食道腴晬在面何待草木堅髮齒願公廊廟等山林
安樂百年無此彼非公自壽蓋壽人坐看同老陶唐氏
端如八柱屹青蒼共承峻極何時已

隋堤採葦

老夫少時性豪侈頗復慨想諸公子家徒四壁不自憐
客來笑呼客且止牧羊幸得時擊鮮種秫足救餅壘恥
萍蘆豆粥何足數紅梁雀黍屢登七老來百呼無一諾
空瓢但酌三江水侍祠何功費太倉月賜萬錢良過矣
秋採菊英春採薺歲月無憂三百指西湖兩年相慰藉
東風為長萼絲紫年來吏滿官有程退無可耕那得已
曉猿夜鶴謝游從筆牀茶竈供行李異時浮家淮海上
魚鰕舟量賤無比白魚截玉數尺長本不論錢數魴鯉

祇今寸鱗乃許價無魚自應相貴爾謂當此行且空飯
彈缺而歌遠淮市誰知一飽不足慮造物尚得相料理
榆堤雨潤風力和老楊出茵鷄駢背輪困長芽長雲葉
磊落小叢攢玉蘂呼兒採掇歸自烹不遣辛酸亂清美
五芝風味均茵憑八珍品目當奴婢不貪俎豆逐駑馬
肯同腥羶怒螻蟻君看五鼎或殺身未如老楊饑足恃
後逢枯朽慎勿薪太和蒸之有如此

早春

女夷爭名亦早計，凌寒破臘回春意。不待梅花送消息，
細風平日先妍媚。野塘冰魚翻暖綠，官橋烟柳搖寒翠。
佳人青鬢耐時節，彩幡初貼宜春字。唯有朱顏不我留，
歲月翩翩定容易。柳車載窮安肯行，若華翳日何當試。
憶昨狂心逐蝴蝶，踏月追春藉花睡。如今佩犢老東岡，
杏花菖葉催田事。眼看風光搔白頭，斜陽抱來空多思。
師文莫君以詩從僕求字，願非所長，聊作一篇。
姑慰其厚意而已。

廣文無擅風撼頰凍坐慈恩書柿葉乞米珍題矯龍鳳
望粥嬌兒鬧鵝鴨不須歐家管城子鏤象雕犀作袍恰
娥眉曼睩初丰容一笑自粲非寶曆當時臨池亦苦矣
烟蒼雨暗漫襟袷幾何白骨變黃泥安用玉軸留華篋
要當約略記姓名作底砵傍坐疲茶我今姓名亦懶記
几硯塵埃卧羊鬣君詩求字得我驚索金懸磬真所乏
歸田當賦覓枕詩豈有來禽青李帖

上湖守余行老

先生吟文頰頰舌未免諸生笑於列跋前疇後誰使然
只有名多磨不滅燕公策高思精壯筆下辭華爛文纈
岳陽少屈何足云自喜江山助清絕墨畦筆逕久榛蕪
道山初識今文伯鳳凰池畔未歸身水晶宮裏重遊客
讀書不知已幾世汲古長餘綆千尺莫貪雲水供醉吟
尚有典章須粉澤防風山前癡病吏自笑著書玄尚白
蓬頭承覲十年事過眼法書今霧隔那知流落得依憑
天與虺隤寬轡策汀洲白蘋春幾許江南日落汀洲古

風光無恙似當時猶與溪山相媚媼昔人苦吟終不盡
祇今餘秀當勤取阿房賦客舊主人試數文章猶第五

題雷峯塔南山小景

錢塘門外西湖西萬松深處古招提孤塔昂昂據要會
湖光灑灑明巖扉道人安禪日卓午寺外湖船沸簫鼓
靜者習靜厭紛喧游者趨歡窮旦暮非喧非寂彼何人
孤山詩朋良獨清世間名利不到耳長與梅花作主盟
嗟我於此無一得曾向峯前留行跡天涯暮景盍歸來

坐對此圖三太息


寄程漕

風流三老今無有明珠雙壁公其後
長安初見紫微人山陽遂識生風手
同時蜀秀共差遲今日吳餓付忠厚
吳餓欲飽談笑了要使嘉禾出稂莠
紫微賓客多雲霄誰數諸侯牛馬走
黃金單盡會屠龍白髮鬍鬚成畫狗
絳衣玉具無處覓將軍縱在大夫取
公歸願作水衡丞敢厭督郵辭五斗

寄曹使君

幕中墨客隨車後，架上牙籤遮坐右。唯留筆研乃自鑄，
豈惜車茵容吏嘔。青霞老去雲海深，舊遊尚見翻濤手。
寄聲秀句風入懷，坐念清標月當牖。天公厚我過穆生，
何止饜韓仍飲柳。請同韶濩公勿疑，老馬由來識途久。
近緣嗜酒識聖賢，已付長酣無可否。公當紫綬日垂腰，
我已禿襟時見肘。慕公澄撓等清濁，歎我雕污終糞朽。
詩從子建豈易親，句語懷英那肯偶。清風自己已入公脾

我如惡木何勞吼



欽定四庫全書

集部

東堂集卷三

四

詳校官庶吉士臣陳若霖

侍讀臣孫球覆勘

謄錄監生臣陳

祁

欽定四庫全書

東堂集卷三

宋毛滂撰

五言律詩

代人和御製上巳錫宴詩

賜禊追三日聞鶯轉萬年恩深重湛露氣暖入非煙
睿作端知聖清尊不翅賢眼明驚既醉奎彩下雲天

曲水傳觴盛皇祇布德初海波翻雅奏雲露濕華裾
晴送君恩暖寒收物意舒春耕無歎息庶不負于胥

原註薦
公劉于

胥斯原以居人民既輯而繁矣既聽而順矣
乃宣之使出耕作而樂其事勸其功無永歎者也

送夏辟疆解官

北風吹勁翻凌厲欲雲奔門棒斂行色縣花消別魂
進舟寒瀨澀回首亂山昏珍重操刀事余言淡可吞

趙宣德生日

仁飈扇佳氣暎暎自門廬閒日風波外長年霜雪餘

原註

趙休官今七十八矣凍醪合鑿落春意動籐簪定有升仙骨黃精

易掃除

送徐次山督郵之官

外臺綱紀掾先辟漢名人霜隼九秋氣風駒千里塵鄉
評元自好府望復名新竹箭黃金鏃送君江水濱

訪琳老題溪上小軒

小檻閒風物高僧秀肺腸隔溪通竹色開戶納山光撥
雪晨蔬瘦燒松午茗香淵明歸賦急聊復此徜徉

登普寧寺歲寒庵面江山之勝令人欲賦而長
老因公出詩集相示作此詩謝之

此老諸緣薄詩情忽漫深
敲門移穩字彈指得真心
松竹藏幽討溪山助苦吟
解鞍聊為賦去不負登臨

八月二十八日挈家泛舟游上渚詩

秋色向幽處浮家聊遠尋
醉來蓬鬢亂臥入蓼花深
雲壑封詩物煙波留客心
未應兒輩覺餘醪且勤斟

和王宣義買菊栽二首

秋風有好色寄在菊花團
弛擔知新主臨池得細看
金房迎日秀玉露作香寒
獨負東籬意年來漉酒乾

未見花盈把先教蜂作團
孤根聊得售秀色後當看
莫訝全開晚須知獨耐寒
雲含墮簷日天恐露香乾

閣黎從上人予往年香火院學徒也去之天竺
益求其師之說歸為邑人言之予自江東歸見
於昭慶寺喜其進學不已為作此詩

世外忘家子歸來誰與游
燒香如意夜茹菊鉢盂秋
獨節已蕭冷諸緣應罷休
渡江聞道日少為故山留

去國呈蔡元度

去國黃流急搔頭白髮新
牛衣還卒歲狗監定何人
奏
儻寧妨跛為郎正礙貧
鄙文無恙否醬瓿盍相親

書禪靜寺集翠堂示堂中老人琳徑山詩

煙岫供寒翠風簾舞小晴
短墻分竹色虛戶納松聲
弄
筆雲窻暖煎茶玉醴輕
端知孤檜月獨伴夜禪清

次沈會宗韻

故人老蕭散久客寡諧同
病骨侵山雨孤帆落渚風水
清應弔影坐闌想書空我亦
青州闊經年不一中

謝陳進士見示詩賦并以為別

陳子賦可喜十詩仍好辭亦云餘事爾何累壯夫為語
浸初已漫筆峯時出奇息肩當益學葵圃未應窺

趙樂道輓詩二首

耆舊彫零盡歸來悲故鄉雲山橫爽氣杖履屬空牀蚤
發名難沒終榮德未央芝蘭日夜長遺範在諸郎

貧賤通姻好淒涼累賞音空知典刑在誰聽短長吟飛
鶴窺塘水眠牛傍柏林龜魚迎拄杖猶出畫橋陰

徐守生辰

徐卿二子後吉夢亦羅熊骨氣本英物文華今鉅翁聊
因頷燕出已覺額犀豐誰伴歲寒色冰霜十八公

宿蓮花寺頃從清獻公游今十年矣

一徑通松竹入門聞夜香青燈孤照佛斜月靜歸廊未
厭逢僧拙終慚涉世忙十年猶彷彿一夢自淒涼

去國

馬劍何妨壯琴書半不輕心通平野闊眼接衆山明老

大空行李疎慵豈利名夏侯知苦學殊未勸歸耕

林進士數見過又遺一詩輒以奉報

夫子胡為者行吟頗自竒少年應苦學今日定何之天
地空羸馬肝腸飽舊詩江邊餬口掾風雨共淒淒

東裝

東裝親匣劍撥火喚勞饋鴟散鷄聲斷煙低野色分徘徊
半樹月拍塞一山雲叫助日車上扶桑猶未聞

逢故人

落日仍江縣相逢下馬鞍
頻憂從者病可奈故人寒
老大囊書脫平生匣劍乾
長年祇少睡忽漫語盤桓

欲入山訪參寥預令探梅

誰作東州客支公合往還
想無詩外事聊輟定中間
拂石須相憩留雲欲共攀
為尋梅發處先過向南山

仲夏月夜懷陳西安

原註陳治邑有政績不得于上位

飛蓋西園夜抽毫失謝君
徘徊下修竹暗澹入浮雲
素彩漫仍見微芒細可分
徒知此紈扇離畢未前聞

十月十日訪琳道人於禪靜寺與之徘徊泉石
間甚久道人云有大龍團藏亦數年食且幾盡
因出刀圭許而龍軀僅餘一爪色理極蒼古又
云趙清獻公嘗得須菩提畫像乃張畫壁間煎
所謂龍爪以餉僕迫夜來歸坐縣之東堂見月
奉寄一首

道人泉石畔餉我欲盤桓見爪蒼龍古顰眉古佛寒家
風真草草詩句自珊珊今夜東堂夢雲披月萬竿

原註
集翠

堂後山勢坡陀可喜四隅修竹
森然今夜月色澄皎定有清趣

宗福宮雨中種栢

未障侵簷日先留出殿煙雨根蚯蚓活風葉鳳凰翩直
節從孤瘦寒姿定老堅君王千萬壽合作酒如泉

和賈耘老

有引

蕞爾小邑在桑林間豚肩濁酒苟飽而已足下
乃幸臨之顧無以相娛樂別未三日老僕即被
病臥家至今殊未佳健得書承感寒竟未去體邇

來定已寧泰否示二詩良佳屬疾一篇輒和云
渴令平生病年來病更多腰仍難老折腸亦舊無他知
子眠三逕逢秋欲七誦勲名郵傳爾唯日飲無何

僕方伏枕呻吟中強繼此詩既自道僕意末章
聊以奉廣十八翁不足云也園亭之什亦和云

河陽春在否柳外小朱扉曲徑蛇應鬪危簷鳥欲飛主

人同燕幕歸意屬漁磯莫待羣花笑秋風鬢綠稀

原註
僕年

來兩鬢星星耳聾齒搖百念衰冷豈復花間人也亦為
後人作狡獪爾一笑足下何時能復至此僕僕被裹糧

唯日須歸去
無他念也

熊侍郎挽詞

蚤見聲華就終違勲業尋餘忠朝露泣遺直夜臺深威
落諸蠻膽恩留五嶺心從今舍人樣萬栢覆蕭森

題陳用中行藏樓

此樓託蕭冷莫會子登臨弔影漫愁獨書空誰語深簾
開不盡眼雲起未休心咫尺顏淵坐高風無古今

鄭君瑞示同諸公遊定空佳什僕亦久欲與君

瑞尋春衰病方窘風雨以故未果聊次韻一首

佳哉五英雋並駕玉為林傾蓋分不淺好山情已深

原註君瑞

亦近至此

春光不約畧晴意恰沉吟老病未堪出詩鋒遙見

侵

送教長老入山

秋容正搖落山意恰淒清冰徹萬緣冷雲隨兩屐輕冥
鴻那復下膏火莫重明天地郵亭爾百年真倦生

送僧常妙還永嘉

原註妙持金剛呪為人驅鬼物有功

杖策辭江寺秋途誰與偕霜風侵布衲草露濕芒鞋收
鉢無餘事還鄉非俗懷金剛真有力魔避不須排

無畏道人居觀音院奉寄一首

松石真佳伴雲山得破顏高人本無住倦翮自知還詩
外塵緣盡齋餘齒頰閒何消一句子截斷碧溪灣

曉出響應山過靜林道中奉寄琳老

案宋詩紀
事題作曉

出定
光寺

曉色開霜坂飢鳥啄麥畦山腰餘雪瘦天面冷雲低寒

意梅花北

原註靜林殿下有梅數株

禪心栢子西牕前借殘月照我

度前溪

下渚湖

春渚連天闊春風夾岸香飛花渡水急垂柳向人長遠

岫分蒼紫澄波映渺茫此身萍梗爾泊處即吾鄉

案北詩永

樂大典原本闕佚今從武康縣志采補

題餘英館

故第園林改遺亭壁戶新垂虹一橋月夾繡兩隄春花

落俯流水鳥啼懷故人憑欄看翠竹無意數游鱗

宋此詩永

樂大典原本闕佚今從湖州府志采補

七言律詩

上林內翰二首

內廷吳陸善文書絕代如公可數渠科斗他年載深厚
楞伽終日伴清虛濟時即展經綸業華國聊施采色餘
想為君王話堯舜玉堂對罷夜何如

短褐風霜可奈何嬾求長袖舞陽阿九遷行輩青雲滿

百謫形骸白髮多束帶壯懷渾齟齬角巾閑約亦蹉跎

原註某託於東都逆旅主人五六寒暑進不能追參高妙退不能伏與潛深茲可鄙憐者也

山公有

意相題目李緒無容獨詆訶

次韻曹子方

盾威正赫忽衰殘人意渾如水面寬觸石端來慰枯槁
隨車定見濕朱丹初憂連畛秋無種豈望如雲晚可觀
天遣商羊為公舞絕勝九仞見回鸞

寄蔡學士

陸陸微生不可論
半飢半飽過朝昏
春來但見瞳花亂
寒退長餘鬢雪繁
老愧門墻忝賓客
歸來耒耜教兒孫
會應飛墮江湖去
定向離騷寄客魂

師文莫君以僕治東園甚力官滿且去為賦詩
以道眷然之意次韻奉答

小桃繁杏何須論
只要池邊竹半林
不養鳧鷖憐淥淨
苦留風月伴清深
後人來蔭十圍木
故老看移一畝陰
分付庭梅管春色
長官情味此花心

次常山簡叔祥

歸來久客鬢俱蒼，漸喜無人餽五漿。
未免高僧問勞苦，

原註至此獨三
數僧自郡來

故應喬木慰淒涼。山中猿鶴人誰健，門

外蒿萊想自長。為謝邦人豈吾薄，要當六印遶腰黃。

柳軒雪夜

曛黃飛雪已填門，獨夜人依老柳根。
故遣捲簾從骨冷，不妨開卷自燈昏。
餘英煑茗春雲動，潤氣留香宿霧繁。
但覺詩脾兩清絕，可勞騷客賦招魂。

書懷寄贈曾公哀

宦情光景半樵漁，病惰仍忘百紙書。
賦就祇堪供醬瓿，齒殘未可釋鹽車。
朱藍要使辭秋斷，芝菌猶當出腐餘。
慚愧少翁能下士，馬曹知馬自應疎。

仁義驛中

原註九月三十日謁告去郡

騎驢何似賈司倉，行李唯餘古錦囊。
秋後恰容鷹脫架，春來會有燕投梁。
清時無用材雖拙，白日能閒策亦長。
慚愧平生負三尺，一成泉石欲膏肓。

次韻許簿游響潭回

一派飛泉濕嶺雲巖花媚好尚餘春
黃紬病情誰如我
碧玉寒清自照人
山水窟中為俗吏
簿書叢裏得詩鄰
一篇寵寄高難和
萬卷端知筆有神

東歸呈元度

此生文字送分陰
羈旅無材發喋吟
鬢底星星侵晚色
胸中落落負初心
端知坐索長安米
那復能彈單父琴
投老襄陽真自棄
蹇驢東去亂雲深

哀程袁州

坐令荆國得髦英清獻先生語不輕漢使曾觀楚風俗
蜀翁未識魯書生楊林墜露隨沉魄叢玉留詩負風情
欲問典刑波浪闊遙知蘭砌五經橫

郭別駕秋日行縣奉寄一首

秋壑相迎故出奇便應到處小遲遲不妨簿領紛遮眼
未礙嵐光秀入脾小睡寧尋兒女夢新詩定寫水雲姿
舊中墊角風流在何許杉篁暮雨時

從范使君求酒

方寸陶陶事不根，但知力飲送朝昏。
無田種秫空為吏，有麴成封即閉門。
避暑此間真有意，悲秋今日得無言。
孔公坐上多餘瀝，易滿農家老瓦盆。

重來

出門聊作書生詠，倚馬猶能梁父吟。
汾水寧無注書地，秦關已老棄繻心。
重來樵釣深相識，未遍湖山擬細尋。
白眼何勞預人事，但知要得酒船深。

屬者觀池檻清明泉激石立蘆叢交碧文禽並
絢備然發湖山之遠態無輦轂之浮埃杜子美
云朱門之泥塗士子不見其泥塗良非是也

圖書多似道家山池檻清虛不綺紈萬壑春藏三石秀
五湖秋入兩蘆寒冰泉噴激珠成貫繡羽沉浮花作團
誰伴玉皇香案吏光風霽月在闌干

聞諸君不裹糧遊山暮歸清坐靜林僧居相與
樂以忘飢僕老病獨在見遺辱君瑞示詩盛道

僧居梅竹之賞輒次韻奉答

禪房何許最深庚嶺梅邊晉竹林
餉客好山勝挈榼遺予病骨任支琴
應飡秀色燕溪茗想待暗香來水沉
何似拍浮從我醉夜船藉月碧千尋

送巨中教授解官

天公憐我欲無鄰得近芝蘭久益芬
定免幼安還割席擬從東野若為雲
歸鞭那有蓋關雪別夢應通魯水芹
強飯勉之書滿載與君千里共斯文

次韻琳老中秋月

玉斧修輪減玷痕，金精鑄魄凝寒清。
綴雲都去秋心淨，囊露新添夜眼明。
氣接瑤臺端可御，地漫銀漢定誰傾。
何時天竺山前路，細聽煙崖墜子聲。

仲夏月夜懷陳西安

長恨浮雲點太清，袂今何許問天晴。
渾憐短夜相催下，不放孤光自在明。
幸與高樓通遠覽，未勞殘燭更前行。
此心對酒蕭條在，咄咄置之聊自傾。

上執政

廊廟無塵鑑色寒私門誰啟手親闕萬邦和氣君臣裏
一代文章伯仲間多士揚眉詣東閣真人拱手倚南山
青天白日才亭午不遣雲隨霰雪還

訪鄭叔詳回得花滿盤作短詩以寄

參軍肯自笑蒼顏花趁籃輿簇玉盤
賸取必知叢蝶恨
欵行聊許路人看
娟娟靜靜春情好
淡淡濃濃粧色殘
已遣小蠻歌送酒
故教亂插竹皮冠

東堂獨坐懷琳老二首

聞道年來多掩關，高情定滿渺瀰間。
秋風不怕清難忍，曉日應分暖伴閒。
欲喚扁舟弄雲水，已疑小閣厭溪山。
東堂枉把歸來賦，慚愧寒空倦翮還。

栢爐煙冷尚餘薰，老去孤城愈不羣。
沙上晚晴知獨往，堂中秋思與誰分。
隔溪有伴蕭蕭竹，對戶無情冉冉雲。
南北東西均是寄，定回歸鴈不應聞。

六月二十日舍賈耘老溪居旦起蔡成允見訪

僕方蓬頭赤脚坐溪上乃用此見成允而君不
以為無禮反寄詩有褒借意甚愧過情戲作一

首奉報

寒溪破曉喜相過不怪蓬頭尚養疴躍馬懷金君蚤晚
歷階歛血我蹉跎詩人自與塵埃遠病骨終慚粉澤多
別寄釣魚船上曲要留風月伴煙蓑

坤成節

穆穆真人第幾天九龍扶輦下非煙定知蟾彩騰光夜

聊待蟠桃得熟年國步無疆金柱健官聲有道兔罝賢
大邦欲効封人請珍重祇園妙相僊

對月

柳梢地面絕微風一片寒光萬里同冰骨直疑潛裏換
塵心都覺坐來空蚌胎有露珠成顛蟾窟無雲玉作宮
莫怪幽人吟到曉不知清興自無窮

道上口占

屹屹高山自兩邊紛紛鷄鴨苦當前敗垣過竹還當道

脫葉憑風欲半天定恐黃茅蔽伏兔更呼青漢落飛鷗
一寒如此空形影獨賴狐裘三十年

謝郭倅見訪

及榻青苔疊亂錢端知骯髒倚門邊蒿萊歲晚荒三徑
殺酒人踈問一屢懶慢容教著帽進傳呼驚起藉糟眠
分庭未覺題輿寵下士徒知公子賢

建中上元以雨雪敗懸燈以國憂罷行樂僕又
以老病連日在告辱師與成君見示佳章聊作

一首

老去追遊骨亦疲，黑甜唯覺睡如飴。
漸差素彩弄華髮，猶夢清妍侍曲眉。
愧甚雕樽負珠履，獨餘殘雪照書帷。
未妨管領東風在，官柳溪梅不用疑。

充叟九兄以書問鄱陽官况因亦問訊

信來頻慰別離魂，苦問官情却懶言。
多睡正隨蝴蝶夢，相憐空愧鶴鴒原。
幸無俗客干書戶，遥想青山對縣門。
定是放衙能少事，悠哉岸幘步槐根。

去國

年來去國故遲遲坂上長鳴老益悲不作居山慚捷徑
疆須了事學癡兒風霜冷面何能笑藜藿空腸未厭飢
里巷定無楊得意朝廷合有鄭當時

紅梅

何處曾臨阿母池渾將絳雪點寒枝東牆羞頰逢誰笑
南國醜顏強自持幾過風霜仍好色半呼桃杏聽羣兒
青春獨養和羹味不為黃蜂飽蜜脾

次韻成允寒秀亭

伐蒿種竹作清深洗石鋤垣出翠紋玉節露勻新帶月
苔膚雨澀細留雲四簷妍色開晴曉一畝濃陰寄夕醺

陶令醉時煩客去夢魂瀟灑與誰云

原註此亭舊為蒿菜之地今亭畔石乃故

牆兩堵材也

十二月二十六日出郊訪無畏詩禪暮歸奉寄

寒郊獨往興悠哉問訊山翁破臘回犀軸冰寒苔水向
衲衣雪暗錦營埃歸時煙樹鷓聲集望處溪窻山色來

此意兒童終不覺閉門脫屣拂莓苔

原註無畏近自杭
來出吳興太守詩

軸所居臨溪開小窻坐見羣山僕歸
途二三里比至縣齋此山猶在望中

